

permittit, ut deploratae haereseos damnet omnes, quicumque id Christo Domino tribuendum esse docent. Eas inquam nobis causas fuisse nostrae a Papismo separationis iuxta Propheticeam et Aposto- (163) licam doctrinam, cum non ignoret Hosius, qua fronte obsecro nos eius idololatriae accusat, quae ei non permittat ullam nobiscum conciliationem? Hosio, idololatria est scilicet, eum honorem Spiritui Sancto, Scripturarum auctori, deferre, ut sine earum doctrina, quae eadem Spiritus Sancti doctrina est, nihil neque constitui in Ecclesia neque recipi possit, et est summa Sanctulo Hypocritae pietas, Dominatum sibi in Ecclesiam, in Scripturas, denique et in Deum ipsum, sub fuce Ministerii arrogare. Habeat vero sibi et suis Hosius pietatem hanc suam, dum volet, nos in eo per Dei gratiam persistemus, ut Dominatum in Ecclesiam nullo plane modo ferendum in ullo homine, ne dicam nobis usurpandum quoquo prorsus modo aut praetextu esse statuamus, quod quidem ad cultum Dei in publico Ecclesiae Ministerio attinet. In scripturas vere Canonicas tantum abest ut nobis iuris aliquid autoritatisve censoriae arrogemus arrogari- (164) ve, non iam ab ullo uno homine seu Synodo ulla, sed ne ab universa quidem orbis totius, omnium temporum ac locorum Ecclesia etiam posse credamus, — quin potius unanimi scripturae menti ac consensui quatenus illum Spiritus sanctus, nullis alioqui locis, personis aut successionibus ordinariis ut vocant alligatus, nec quibus nos volumus, neque quando volumus, neque pro eo ac nos volumus, sed quibus ille vult, quando vult et pro eo ac vult, iuxta Divinae providentiae suae nobis incognitae consilium patefacere dignatur, nostra subiicimus omnia et, praeclaram Magni Basilii sententiam sequuti, apostaticum a fide delapsum et liquidum superbiae crimen esse docemus, aut respuere aliquid, quod in Scripturis continetur, aut quicquam omnino inducere, quod non continetur. Contineri autem dicimus, non ea tantum, quae verbis illic expressis scripta habentur, sed quae etiam per legitimum atque unanimem (165) locorum collationem peti inde velut e fontibus ac rivulorum instar deduci colligique possunt. Postremo in eo quoque Divinis auspiciis persistemus, ut cum veteri Israelis Ecclesia supplices dicamus” Omnia verba, quae loquutus est Dominus, faciemus” hoc est, debiti id officiique nostri esse profiteamur, obedire Domino Deo nostro in omnibus mandatis atque institutionibus ipsius, quatenus quidem in Scripturis sanctis, ut diximus, continentur, etiamsi neque mandatis per infirmam alioqui nostram obedientiam, neque promissionibus item per adnatam nobis incredulitatem satisfacere ad plenum unquam omnino possimus. In hac inquam, ut Hosius quidem iudicat, idololatria persistemus per Dei gratiam potius, utcumque frendat ringaturque Hosius, quam